

“Trastbank” xususiy aksiyadorlik banki tomonidan
o‘zini o‘zi band qilgan shaxslarga mikro kredit
berish tartibi haqida nizom”ga
4-ilova

Mikro kredit shartnomasining namunaviy shakli
(ushbu Nizom 19-bandining “a” kichik bandi bo‘yicha)

Mikro kreditning to‘liq qiymati: ____ (_____) foiz

MIKROKREDIT SHARTNOMASI

20 __ yil “__” _____ № _____ shahri

“Trastbank” xususiy aksiyadorlik banki “_____” bank xizmatlari ofisi
(vakolatli bank xizmatlari markazi) (keyingi o‘rinlarda – Bank) boshqaruvchisi (boshlig‘i)
_____ Nizom va Ishonchnoma asosida faoliyat yuritib, bir tomondan, va
o‘zini o‘zi band qilgan shaxs _____ (keyingi o‘rinlarda
– Qarzdor/mijoz), ikkinchi tomondan, mazkur Shartnomani quyidagilar haqida tuzdik.

1-§. Shartnoma predmeti

1. Bank ushbu Shartnomada nazarda tutilgan shartlar asosida Qarzdorga/mijozga _____
(_____) so‘m mikro kredit beradi, shundan _____ (_____) so‘mi
garovni (sug‘urtani) rasmiylashtirish uchun ajratiladi.
2. Mikro kredit _____ ajratiladi.
(*naqd pulsiz shaklda yoki naqd pulda*)
3. Qarzdor/mijoz tomonidan olingan mikro kredit hisobini yuritish uchun Bank unga tegishli
mikro kredit hisobvarag‘i ochadi.

2-§. Shartnoma qiymati

4. Mikro kreditning foiz stavkasi yillik hisob asosida _____ % miqdorida belgilandi.
Mikro kredit mablag‘i ushbu Shartnoma shartlariga muvofiq o‘z vaqtida qaytarilmagan taqdirda,
muddati o‘tkazilgan qarzdorlik uchun mikro kreditning foiz stavkasi yillik hisob asosida _____ %
miqdorida o‘rnatiladi.

5. Mikro kredit bo‘yicha asosiy qarz va unga hisoblangan foizni to‘lash tomonlarning o‘zaro
kelishuviga muvofiq _____ usulida amalga oshiriladi.
(*differensial yoki annuitet*)

6. Bank mikro kreditdan foydalanganlik uchun foizni Qarzdorga/mijozga haqiqatda berilgan
mikro kredit bo‘yicha asosiy qarzning qoldig‘iga nisbatan ushbu Shartnomada belgilangan nominal
stavka bo‘yicha hisoblaydi. Bunda, mikro kreditdan foydalanganlik uchun foiz mikro kredit
mablag‘i Qarzdorning/mijozning hisobvarag‘iga o‘tkazilgan yoki Qarzdorga/mijozga naqd pulda
berilgan sanadan boshlab hisoblanadi.

Mikro kredit bo‘yicha asosiy qarz va unga hisoblangan foizni to‘lash ushbu Shartnomaga
ilova qilingan mikro kreditni qaytarish jadvaliga muvofiq amalga oshiriladi. Mikro kredit to‘lovi
dam olish kuniga to‘g‘ri kelsa, hisoblangan foizni to‘lash dam olish kundan keyingi birinchi ish
kunida dam olish kunida hisoblangan foizni hisobga olgan holda amalga oshiriladi.

Qarzdordan/mijozdan mikro kreditning joriy to‘lovi uchun mikro kreditni qaytarish jadvalida
belgilanganga nisbatan ko‘p mablag‘ kelib tushsa, u holda Bank kelib tushgan mablag‘ning
ortiqcha qismini qarzdor/mijoz mikro krediti bo‘yicha asosiy qarzni so‘ndirishga yo‘naltiradi
hamda mikro kredit qiymatini qayta hisoblaydi.

Mikro kreditni qaytarish jadvali rasmiylashtirilgandan so‘ng mikro kredit bo‘yicha
moliyalashtirishni boshlash muddati o‘zgarganda, shuningdek Qarzdor/mijoz tomonidan

mikrokredit qisman muddatidan oldin so'ndirilishi munosabati bilan mikrokredit bo'yicha to'lovni amalga oshirish sanalari va muddatlari yoki oraliq mikrokredit to'lovlarining miqdori o'zgarganda Bank mikrokreditni qaytarish jadvalini yangidan rasmiylashtiradi. Bunda, mikrokreditni qaytarish jadvali yangidan rasmiylashtirilishi bilan undan oldin mavjud bo'lgan mikrokreditni qaytarish jadvali o'z kuchini yo'qotadi.

7. Qarzdorning/mijozning mikrokredit bo'yicha amalga oshirgan to'lov qiymati ajratilgan mikrokredit bo'yicha majburiyatlarni bajarish uchun yetarli bo'lmasa, O'zbekiston Respublikasi fuqarolik kodeksining 248-moddasiga muvofiq, kelib tushgan pul mablag'i ushbu Shartnoma bo'yicha qarzdorlikni to'lashga quyidagi ketma-ketlikda yo'naltiriladi:

- a) asosiy qarz bo'yicha muddati o'tgan qarzdorlik va muddati o'tgan foiz to'lovlari mutanosib ravishda;
- b) joriy davr uchun hisoblangan foiz va joriy davr uchun asosiy qarz bo'yicha qarzdorlik;
- d) jarima va penya;
- e) kreditorning qarzdorlikni uzish bilan bog'liq bo'lgan boshqa xarajatlari.

3-§. Tomonlarning huquq va majburiyatlari

8. Bank quyidagi huquqlarga ega:

a) Qarzdorning/mijozning to'lovga layoqatlilik qobiliyatini yanada to'laroq tahlil qilish uchun undan qo'shimcha hujjatlar talab qilish, joyiga chiqqan holda o'rganish;

b) Qarzdor/mijoz mikrokreditdan shartnoma tuzilgan kundan e'tiboran bir oy ichida foydalanmagan taqdirda, shartnomani bekor qilish haqida qarzdorni/mijozni yozma ravishda xabardor etish orqali ushbu shartnomani bir tomonlama bekor qilish;

d) mikrokredit belgilangan muddatda so'ndirilmaganda, mikrokredit qaytarilishi yuzasidan ushbu Shartnoma shartlarida belgilangan tegishli choralarni ko'rish;

e) Qarzdorda/mijozda asosiy qarz va/yoki foiz bo'yicha muddati o'tgan qarzdorlik paydo bo'lganda, Qarzdorning/mijozning bank kartasi, omonat va boshqa depozit hisobvaraqlaridan ushbu qarzdorlikni akseptsiz tartibda undirish (bunda Qarzdorning/mijozning mikrokredit bo'yicha qarzdorligini so'ndirish uchun uning bank kartasi (omomat va boshqa depozit) hisobvarag'idan mablag' Qarzdor/mijoz topshirig'isiz hisobdan chiqarilganda, bank xizmatlari ofisi (vakolatli bank xizmatlari markazi) tomonidan mablag' hisobdan chiqarilgan sanadan boshlab keyingi ish kunidan kechiktirmagan holda Qarzdorga/mijozga uning bank kartasi (omomat va boshqa depozit) hisobvarag'idan qancha miqdordagi mablag' qanday sababga asosan Bank foydasiga undirilganligi ko'rsatilgan holda xabarnoma yuboriladi);

f) Qarzdor/mijoz tomonidan ushbu shartnoma bo'yicha asosiy qarzni qaytarish va (yoki) hisoblangan foizni to'lash muddati buzilganda nizoni sudgacha hal qilish yuzasidan o'z talabnomasini Qarzdorga/mijozga yetkazish;

g) Qarzdor/mijoz talabnomada belgilangan muddatda ko'rsatilgan talablarni lozim darajada bajarmaganda, sudga da'vo bilan murojaat etish.

9. Bank quyidagi majburiyatlarni o'z zimmasiga oladi:

a) mikrokreditni Qarzdorga/mijozga 20 yil "___" _____ dan 20 yil "___" _____ gacha bo'lgan muddatga berish;

b) Qarzdorning/mijozning so'rovi bo'yicha mikrokredit hisobvarag'ining holatiga oid ko'chirmani taqdim qilish;

d) mikrokreditni muddatidan oldin undirish sababi haqida Qarzdorni/mijozni xabardor etish;

e) Bank Qarzdorga/mijozga ushbu Shartnomada nazarda tutilgan mikrokreditni berishdan butunlay yoki qisman bosh tortgan taqdirda, mazkur mikrokredit bo'yicha mablag' berishni to'xtatib qo'yish to'g'risida qaror qabul qilingan sanadan boshlab keyingi ish kunidan kechiktirmasdan Qarzdorga/mijozga mikrokredit berish to'xtatilganligi va uning sababi yuzasidan yozma xabarnoma yuborish;

f) mikrokredit bo'yicha muddati o'tkazib yuborilgan qarzdorlik yuzaga kelganda Qarzdor/mijoz zimmasidagi qarz yuki yanada oshib ketishining oldini olish maqsadida ushbu qarzdorlik yuzaga kelgan sanadan boshlab 7 kalendar kuni davomida har qanday aloqa bog'lash usulidan, shu

jumladan elektron aloqa vositasidan foydalanib, Qarzdorga/mijozga muddati o'tkazib yuborilgan qarzdorlik yuzaga kelganligi haqida mikrocreditni qaytarish grafigini ilova qilgan holda xabar berish;

g) Qarzdorni/mijozni ushbu shartnoma bo'yicha muddati o'tkazib yuborilgan qarzdorlikni qaytarish majburiyatlari bajarilmaganligi holati, muddati, qiymati, tarkibi va oqibatlari haqida xabardor qilish, Qarzdordan/mijozdan muddati o'tkazib yuborilgan qarzdorlik yuzaga kelishi sabablari haqida so'rash;

h) Qarzdor/mijoz tomonidan ushbu shartnoma bo'yicha asosiy qarzni qaytarish va (yoki) hisoblangan foizni to'lash muddati buzilganda nizoni sudgacha hal qilish yuzasidan o'z talabnomasini Qarzdorga/mijozga yetkazish (ushbu talabnomada talabnoma tuzilgan sanadagi Qarzdorning/mijozning joriy qarzi miqdori va tarkibi, qarzni to'lash usullari, talabnomada ko'rsatilgan muddatgacha Qarzdor/mijoz o'z majburiyatlarini bajarmasligi oqibatlari va nizoni sudgacha hal qilish usullari qayd etiladi);

i) Qarzdordan/mijozdan mikrocreditning joriy to'lovi uchun mikrocreditni qaytarish jadvalida belgilanganga nisbatan ko'p mablag' kelib tushsa, u holda kelib tushgan mablag'ning ortiqcha qismini mikrocreditning asosiy qarzini so'ndirishga yo'naltirish hamda mikrocredit qiymatini qayta hisoblash;

j) Qarzdor/mijoz tomonidan mikrocredit bo'yicha qarzdorlik to'liq to'langandan so'ng, ushbu qarzdorlik bo'yicha amalga oshirilgan oxirgi to'lov sanasining keyingi 3 ish kunidan kechiktirmagan holda Qarzdorning/mijozning shaxsiy kabinetida mikrocredit bo'yicha qarzdorlik to'liq so'ndirilganligi va ushbu Shartnoma bo'yicha qarzdorlik mavjud emasligi to'g'risida ma'lumot joylashtirish.

10. Qarzdor/mijoz quyidagi huquqlarga ega:

a) mikrocreditning o'z vaqtida ajratilishini talab qilish;

b) ushbu Shartnoma tuzilgandan keyin Qarzdor/mijoz tomonidan pul mablag'i olingunga qadar bo'lgan davrda mikrocredit olishdan bepul asosda voz kechish;

d) mikrocredit bo'yicha asosiy qarz va unga hisoblangan foizni jarima sanksiyalarisiz istalgan vaqtda muddatidan oldin to'liq to'lagan holda Bank bilan ushbu Shartnomani muddatidan oldin bekor qilish.

11. Qarzdor/mijoz o'z zimmasiga quyidagi majburiyatlarni oladi:

a) mikrocredit ajratilgunga qadar mikrocredit ta'minotiga oid hujjatlarni rasmiylashtirish va Bankka taqdim etish;

b) mikrocredit bo'yicha asosiy qarz va unga hisoblangan foizni o'z vaqtida so'ndirish;

d) yashash joyi, ish joyi, familiyasi yoki ismi va ushbu Shartnoma bo'yicha majburiyatlar bajarilishiga ta'sir ko'rsatishi mumkin bo'lgan boshqa holatlarga oid o'zgarishlar to'g'risida axborotni 5 (besh) bank ish kuni mobaynida Bankka taqdim etish.

4-§. Tomonlarning javobgarligi

12. Tomonlar ushbu Shartnoma majburiyatlarini bajarmagan yoki lozim darajada bajarmagan taqdirda, ularga O'zbekiston Respublikasi normativ-huquqiy hujjatlarida belgilangan javobgarlik choralari qo'llaniladi.

5-§. Nizolarni hal qilish

13. Bank va Qarzdor/mijoz, tomonlarning o'zaro roziligiga ko'ra, qonun hujjatlarida belgilangan nizoni sudgacha hal qilish usullarini qo'llashga, shu jumladan muzokara o'tkazish orqali hal qilishga haqli hisoblanadi.

14. Qarzdor/mijoz nizoni sudgacha hal qilish yuzasidan ushbu Shartnoma 9-bandining "h" kichik bandida qayd etilgan talabnomada belgilangan muddatda ko'rsatilgan talablarni lozim darajada bajarmaganda, Bank sudga da'vo bilan murojaat etadi.

6-§. Korrupsiyaga qarshi qo'shimcha shartlar

15. Tomonlar shartnoma tuzish, shartnomaning amal qilish muddatida va ushbu muddat tugaganidan so'ng shartnoma bilan bog'liq korrupsiyaviy harakatlarni sodir qilmaslikka kelishib

oldi.

16. Tomonlar ushbu Shartnomadagi korrupsiyaga qarshi qo'shimcha shartlarda belgilangan korrupsiyaning oldini olish choralarini tan oladi va ularga rioya etilishi bo'yicha hamkorlikni ta'minlaydi.

17. Har bir tomon shartnoma tuzilgan paytda bevosita o'zi yoki uning ijroiya organlari, mansabdor shaxslari va xodimlari tomonidan shartnoma bilan bog'liq munosabatlar yuzasidan qonunga xilof ravishda pul, moddiy qiymatliklar berilmagani, shartnoma tuzilishi evaziga norasmiy pul yoki boshqa moddiy qiymatliklar olinishiga yo'l qo'yilmagani, taklif etilmagani, ularni berishga va'da qilinmagani, shuningdek, moddiy yoki har qanday turdagi imtiyoz, ustunliklar olinmaganini (kelajakda bu turdagi harakatlarni amalga oshirishi mumkinligi haqida taassurot qoldirilmaganini) kafolatlaydi.

18. Tomonlar mansabdor shaxslari va xodimlari tomonidan har qanday vaqt va shaklda korrupsiya harakatlarini bevosita yoki bilvosita (shu jumladan, uchinchi shaxslar orqali) sodir etilishiga yo'l qo'ymaydi.

19. Qonunga xilof ravishda olingan daromadning legallashtirilishiga, shuningdek, agar mulk jinoiy faoliyatdan olingan daromad ekanligi tomonlarga ma'lum bo'lsa, uni o'tkazish, mulkka aylantirish yoki almashtirish yo'li bilan uning kelib chiqishiga qonuniy tus berish, bunday pul mablag'i yoki boshqa mol-mulkning asl xususiyati, manbai, turgan joyini, tasarruf etish va ko'chirish usulini, pul mablag'iga yoki boshqa mol-mulkka bo'lgan haqiqiy egalik huquqini yoki uning kimga qarashlilikini yashirishga yo'l qo'ymaydi.

20. Korrupsiyaga oid huquqbuzarlik sodir qilish uchun ta'magirlik qilish, undash, tazyiq o'tkazish yoki tahdid qilish holati bo'yicha bir tomon ikkinchi tomonni hamda vakolatli davlat organlarini darhol xabardor qiladi.

21. Tomonlar tovarlar, xizmatlar va ishlarni realizasiya qilish va o'tkazishda yoki ularning manfaatini ko'zlab boshqa harakatlarni amalga oshiruvchi tomonlarning nazorati ostida bo'lgan va ular nomidan harakat qiladigan shaxslarga nisbatan quyidagi harakatlarni amalga oshiradi:

a) korrupsiyaviy harakatlarga yo'l qo'yib bo'lmazligi va korrupsiyaviy harakatlarga nisbatan murosasiz munosabatda bo'lishi shartligi haqida ko'rsatmalar va tushuntirishlar berish;

b) ulardan korrupsiyaviy harakatlarni amalga oshirish uchun vositachi sifatida foydalanmaslik;

d) ularni faqat tomonning oddiy kundalik faoliyati jarayonidagi ishlab chiqarish zarurati doirasidan kelib chiqib ishga jalb qilish;

e) ularga qonunchilik doirasida amalga oshirgan xizmatlari uchun belgilangan haq miqdoridan asossiz ravishda ortiqcha to'lovlarni amalga oshirmaslik.

22. Tomonlar ularning nazorati ostida bo'lgan va ular nomidan harakat qiladigan shaxslar tomonidan korrupsiyaga qarshi qo'shimcha shartlarda belgilangan majburiyatlar buzilganligi holatlari haqida xabar berilganligi uchun ularga tazyiq o'tkazilmasligini kafolatlaydi.

23. Agar bir tomonga boshqa tomonning Shartnomaning 18-bandida belgilangan majburiyatlarning buzilishiga yo'l qo'ygani ma'lum bo'lib qolsa, ikkinchi tomonni bu haqda zudlik bilan xabardor qiladi va tegishli choralar ko'rilishi va amalga oshirilgan ishlar yuzasidan xabardor qilishni talab qiladi.

24. Bir tomonning talabi bo'yicha ikkinchi tomon tegishli choralar ko'rmagan yoki ko'rib chiqish natijalari haqida xabardor qilmagan taqdirda, birinchi tomon shartnomani bir taraflama to'xtatib turish, bekor qilish hamda zararni to'liq qoplab berishni talab qilishga haqli.

7-§. Sanksiyalar ro'yxatiga oid qo'shimcha shartlar

25. Qarzdor/mijoz bank hisobvarag'i bo'yicha bank operatsiyalarini amalga oshirishda Sanksiyalar ro'yxati bilan bog'liq cheklov va taqiqlarga qat'iy rioya qilinishini ta'minlaydi va kafolatlaydi. Mazkur Shartnoma imzolanishi bilan Qarzdor/mijoz tomonidan Sanksiyalar ro'yxati bilan bog'liq cheklov va taqiqlarga rioya qilinishi kafolatlangan hisoblanadi.

26. Qarzdor/mijoz Sanksiyalar ro'yxatiga kiritilgan shaxslar bilan, shuningdek ularning manfaatini ko'zlab ish yuritishi mumkin degan asosli taxmin mavjud bo'lgan har qanday shaxslar

bilan kelishuv, bitim, shartnoma imzolamaydi.

27. Qarzdor/mijoz Sanksiyalar ro'yxatiga kiritilgan shaxslarga yoki ularning manfaati uchun har qanday kelishuv, bitim, shartnoma bo'yicha to'lovlarni amalga oshirmaydi.

28. Qarzdorning/mijozning Bankka taqdim etgan hujjat va ma'lumotlari yolg'on, ishonchsiz va/yoki noto'g'ri bo'lib chiqsa yoki ushbu paragrafda qayd etilgan shartlar Qarzdor/mijoz tomonidan bajarilmasa, Bank Qarzdorning/mijozning topshirig'i asosida amalga oshirilgan bank operatsiyalari tufayli chiqib ketgan mablag'ning qaytarilishi, band solinishi, muzlatilishi, yo'qotilishi uchun javobgar bo'lmaydi.

29. Qarzdorga/mijozga Sanksiyalar ro'yxati asosida vakolatli organ, tashkilot yoki banklar tomonidan cheklov va taqiq choralari (pul mablag'iga band solinishi, to'lovning rad etilishi va boshqalar) qo'llanganligi uchun Bank javobgar emas va Sanksiyalar ro'yxati bilan bog'liq cheklov va taqiqlar tufayli ushbu Shartnoma bo'yicha Bank o'z majburiyatlarini bajarmaganligi yoki lozim darajada bajarilmaganligi natijasida Qarzdorga/mijozga yetkazilgan zararni qoplash majburiyatini olmaydi.

30. Bank Qarzdorning/mijozning boshqa davlatlar qonun hujjatlari bilan cheklangan yoki taqiqlangan bank operatsiyalarini banklar va/yoki kontragentlar foydasiga amalga oshirmaslik huquqiga ega. Bunday holda, tashqi savdo shartnomalari yuzasidan amalga oshirilmagan bank operatsiyalari bo'yicha javobgarlikni Bank o'z zimmasiga olmaydi.

31. Qarzdorning/mijozning topshirig'ini bajarish tufayli Bankka nisbatan mulkiy/nomulkiy sanksiyalar qo'llanilsa, Qarzdor/mijoz Bankka nisbatan qo'llanilgan sanksiyalar natijasida kelib chiqqan zararni qoplab berish majburiyatini o'z zimmasiga oladi.

8-§. Shartnomaning boshqa shartlari

32. Ushbu Shartnomaning ilovasi uning ajralmas qismi hisoblanadi.

33. Mikro kredit bo'yicha to'lov muddati o'tgan foiz yuzaga kelgan taqdirda Qarzdor/mijoz har bir muddati o'tgan kun uchun to'lov muddati o'tgan foiz qiymatidan Bankka __%, lekin muddatida to'lanmagan foiz qiymatining 50 foizidan oshmagan miqdorda penya to'laydi (agar mikro kredit shartlarida muddati o'tgan foiz qarzdorligiga penya o'rnatilgan bo'lsa). Penya to'lanishi Qarzdorni/mijozni muddati o'tgan foiz qarzdorligini to'lashdan ozod qilmaydi.

34. Bank qarzdor/mijoz uchun ushbu shartnoma bo'yicha asosiy qarzni qaytarishning va hisoblangan foizni to'lashning masofadan turib amalga oshirish imkoniyatini yaratadi.

35. Mazkur Shartnoma u imzolangan kundan boshlab to Qarzdor/mijoz tomonidan ushbu Shartnoma majburiyatlari to'liq bajarilgunga qadar amal qiladi.

36. Mazkur Shartnomaning bekor qilinishi tomonlarni u bekor qilingunga qadar bildirilgan o'zaro da'volarni (talablarni) qondirish majburiyatidan ozod qilmaydi.

37. Ushbu Shartnomaga kiritiladigan har qanday o'zgartirishlar ular yozma ravishda tuzilib, tomonlarning vakolatli vakillari tomonidan imzolanganda qonuniy kuchga ega bo'ladi.

38. Mazkur Shartnomada ko'zda tutilmagan holatlar yuzasidan O'zbekiston Respublikasi normative-huquqiy hujjatlari qoidalari qo'llaniladi.

9-§. Tomonlarning pochta manzillari va rekvizitlari

Bank:	Qarzdor/mijoz:
Manzili: _____	Manzili: _____
Tel.: _____ STIR: _____	Telefon: _____
Bank kodi: _____	JSHSHIR:
Bank hisobvarag'i: _____	Shaxsni tasdiqlovchi hujjat ma'lumotlari:
Boshqaruvchi (boshliq): _____	_____
Muhr	Imzo: